

EAE-KO HAUTESKUNDE KANPAINA ABIAN

Mayor Oreja: «Abertzaleen artean guztiak dira erradikalak»

Kanpainaren leloa aurkeztu zuen atzo —*Todo es posible*—, eta alderdiko militanteei dei egin zien «garaipena lortzen» lagun dezaten

Felix Iriarte | GASTEIZ

PPk gaurtik aurrera lau haizeetara zabalduko duen leloa aurkeztu zuen atzo, kanpaina hasi baino ordu batzuk lehenago. *Todo es posible* (Guztia da posible) leloa erabiliko dute Jauralaritza lortzea eskura dagoela adierazteko. Halaber, abertzaleekin ez dagoela zer eginik azpimarratu zuen Jaime Mayor Oreja lehendakariak.

Abertzale guztiak, gainera, zaku berean sartu zituen Mayor Orejak. «Jada ezin dugu esan abertzale moderatuak eta erradikalak daudela. Izan ere, orain guztiak dira erradikalak», esan zuen.

PPko lehendakariak uste du EAJk aldatuko duela jokabidea, baina horretarako ezinbestekotzat jotzen du Jauralaritzan aldaketa izatea. «EAJ ez da aldatuko guk hala eskatzen diogulako. Aldatuko du porrotaren ostean. Horregatik dei egiten diet EAJko oinarriei gure alde azal daitezzen», adierazi zuen.

«Aldaketarako bazkideek» Konstituzioa eta Estatutua onartu behar dute, Mayor Orejak berretsi zuenez. «Konstituzioa eta Estatutua defenditzen

dugunok daukagun onena eman behar dugu. Alternatiba, izan ere, Konstituzioaren eta Estatutuaren gainean oinarritu behar dugu. Hori onartzen duten abertzaleak badaude onartuko ditugu, baina garrantzitsuena da aldaketaren oinarriak sendoak izatea».

Parte-hartzea

Kanpaina egiteko «askatasun falta» somatzen du Mayor Orejak. Kexu da zenbait herri txikitara ez delako bere mezua helduko. «Zenbait herritara iristea ezinezkoa izango da, ETak pisu handia duen herrietan ez baitaigo askatasunik», esan zuen.

Alderdiko kideei kanpainan parte hartzeko eskatu zien PPko lehendakariak. Hori izango da kanpainaren «gako». Halaber, hauteskunde egunean inoiz izan ez den parte-hartzea espero duela esan zuen. Mayorrek espero du parte-hartzea %75era iristea.

EAJ-EAri doako tarteak baimentzeari buruz ere hitz egin zuen Mayor Orejak. «Ez naiz ez poztan ez tristetzen. Gainera, zenbat eta gehiago agertu Arzalluz telebistan, hainbat eta hobeto», adierazi zuen.



MIREN SAEZ

Maria San Gil, Jaime Mayor Oreja, Carlos Iturgaitz eta Ramon Rabanera, atzo, Gasteizen.

ESANAK

JAIME MAYOR OREJA (PPko lehendakariak)

«EAJ ez da aldatuko guk hala eskatzen diogulako. Porrotaren ostean aldatuko du jokabidea»

«Aldaketak oinarri sendoak izan behar ditu: Konstituzioa eta Estatutua. Ezinbestekoak dira»

«Arzalluz eta buruzagi jeltzaleak zenbat eta gehiago azaldu telebistan, hainbat eta hobeto»

AZNARREN ADIERAZPENAK

«Geroa terrorismoaren porrotak ekarriko du»

Jose Maria Aznar Espainiako gobernuburuak adierazi du Euskadiren etorkizuna biolentziarik ezak ekarriko duela. Halaber, Legeak bete behar direla azpimarratu zuen. Aznarrek Espainiako Hautes Batzordearen izena aipatu ez bazuen ere, haren erabakia gogoan zuen adierazpen hori egin zuenean.

PPren Gobernuak urtebete egin du gehiengo absolutuarekin, eta hori gogoratzeko ekitaldi bat antolatu zuen Aznarrek. Espainiako presidenteburuarekin batera Javier Arenas PPko idazkari nagusia eta hainbat ministro izan ziren.

Aznarrek esan zuen ETari gailenduko zaiola, eta etorkizunean ez dela itunik izango ETarekin. Gainera, EAEn alternatiba eraikitzeke Konstituzioa eta Estatutua aldarrikatu zituen. «Ondorio guztiekin alternatiba horren alde egin behar dugu», esan zuen. Halaber, Legea «beti» bete behar dela azpimarratu zuen Espainiako gobernuburuak.

Heldu HAUTESKUNDEEN hariari albistearen iturburutik bertatik.



[maiatzak 13.] EUSKO LEGEBILTZARRERAKO HAUTESKUNDEAK

Hauteskundeei buruzko informazio orokorra

Emaizak, zenbatu ahala

Emaizak posta elektronikoz eta eskuko telefonoz

EUSKO JAURLARITZA



GOBIERNO VASCO

HERRIZAINGO SAILA
Hauteskunde eta
Dokumentazio ZuzendaritzaDEPARTAMENTO DE INTERIOR
Dirección de Procesos Electorales y
Documentación